

Pren o birua?

Moning.

Gamaliel em i wanpela bikman bilong lotu bilong em. Na em i mekim wanpela trupela tok. Em i tok olsem, *“Sapos ol man tasol i as bilong dispela samting ol i mekim (ol samting ol aposel i mekim), orait dispela samting bilong ol bai pinis nating. Tasol sapos God Em i as bilong dispela samting bilong ol, orait yupela no inap winim ol. Nogut pasin yupela i mekim i egensim God.”*

Em olsem na yu gat wanem tingting? Gamaliel em i wanbel long gutnius bilong God o nogat? Gamaliel em i pren bilong gutnius bilong God o em i birua bilong gutnius bilong God? Tru, em i sevim laip bilong ol aposel. Tasol em i pren bilong ol o em i birua bilong ol? Yu gat wanem tingting?

Lukim **Aposel 5:33-42**....

³³ **Orait, taim ol kaunsil i harim dispela tok, ol i belhat nogut tru na ol i laik kilim ol i dai.** ³⁴ **Tasol wanpela man bilong kaunsil, nem bilong em Gamaliel, em i sanap. Em i wanpela Farisi na tisa bilong lo, na ol manmeri i givim biknem long em. Na em i tokim ol long rausim ol aposel i go autsait.** ³⁵ **Na em i tokim ol kaunsil olsem, “Yupela ol man bilong Israel, yupela mas tingting gut pastaim long pasin yupela i laik mekim long ol.** ³⁶ **Long wanem, bipo wanpela man, nem bilong em Teudas, em i bin kirap na em i tingim olsem em i wanpela bikpela man stret, na ol sampela manmeri olsem 400 samting i bihainim em. Ol i bin kilim em i dai na ol man i bihainim em ol i ranawe nabaut na wok bilong em i lus nating.** ³⁷ **Na bihain long dispela man, long taim bilong gavman i kisim nem bilong ol manmeri, narapela man i kirap, nem bilong em Judas bilong distrik Galili. Na em i bin pulim ol sampela manmeri i bihainim em. Na em tu em i dai na ol manmeri i bihainim em ol i ranawe nabaut.** ³⁸ **Em olsem na mi laik tokim yupela olsem, ol dispela man nau yumi holim, orait yumi larim ol i stap. Long wanem, sapos ol man tasol i as bilong dispela samting ol i mekim, orait dispela samting bilong ol bai pinis nating.** ³⁹ **Tasol sapos God Em i as bilong dispela samting bilong ol, orait yupela no inap winim ol. Nogut pasin yupela i mekim i egensim God.”** Em olsem na ol i harim tok bilong em. ⁴⁰ **Na ol i singautim ol aposel i kam insait gen. Na ol i paitim ol na tambuim ol long autim tok long nem bilong Jisas. Na ol i lusim ol i go.** ⁴¹ **Na ol aposel i lusim ol kaunsil na ol i go. Na ol i amamas. Long wanem, God i orait long ol i ken i kisim sem long nem bilong Jisas.** ⁴² **Na long olgeta de, long tempel na long haus tu haus, ol i no lusim wok bilong skulim na autim tok olsem, Jisas Em i Krai.**

Tok Gamaliel i mekim (long **lain 38-39**) em i trupela tok. Tasol dispela i no minim olsem Gamaliel em i pren bilong gutnius bilong God, dispela i no minim olsem Gamaliel em i trupela wokman bilong God. Gamaliel em i mekim wanpela trupela tok, tasol em i no bilipim na trastim na bihainim Jisas. Nogat. Gamaliel em i wanpela kleva man tasol na em i laik lukautim skin bilong em yet na em i mekim toktok.

Ol bikman bilong kaunsil ol i laik kilim i dai ol aposel. Gamaliel em i gat biknem, na taim em i toktok, orait ol bikman bilong kaunsil ol i rispektim tok bilong em (**lain 34**).

Gamaliel em i tokim ol long ol i mas tingting gut pastaim long pasin ol i laik mekim long ol aposel (**lain 35**). Long wanem, nogut ol i mekim pasin bilong egensim God, nogut pasin bilong ol i kirapim God long mekim birua long ol na ol i lukim trabel (**lain 39**). Tok Gamaliel i mekim em i trupela tok, tasol Gamaliel i mekim ol dispela tok bilong lukautim skin bilong em yet – em i no laik ol bikman bilong kaunsil i mekim sampela pasin na God i birua long ol na em i kisim hevi wantaim ol.

Na Gamaliel i makim 2-pela samting bilong sapatim tok bilong em....

1. (Lukim **lain 36.**) Teudas em i tingim olsem em i wanpela bikman, na em i kirapim ol sampela tok, na 400 manmeri samting i bihainim em. Tasol taim ol i kilim em i dai (ating ol soldia bilong gavman Rom i kilim em i dai), orait ol dispela 400 manmeri i ranawe, na ol samting Teudas i laik kamapim i lus nating.
2. (Lukim **lain 37.**) Na wankain samting i kamap long narapela man Judas bilong Galili (dispela Judas em i no bipo disaipel bilong Jisas, nogat, em i narapela man). Na Judas bilong Galili em i bin kirapim ol sampela tok na pulim ol planti manmeri i bihainim em. Na wankain olsem Teudas, ol soldia i kilim em i dai, na ol manmeri i bihainim em ol i ranawe, na samting em i laik kamapim i lus nating.

Na Gamaliel i mekim dispela 2-pela tok bilong soim olsem, sapos ol man tasol i as bilong dispela samting ol aposel i mekim, orait dispela samting bilong ol bai pinis nating (wankain olsem samting Teudas na Judas bilong Galili i mekim na i pinis nating). Tasol sapos God Em i as bilong dispela samting ol aposel i mekim, orait ol man bilong kaunsil ol i no inap winim ol (**lain 38-39**). Gamaliel i pret olsem, sapos God i pas wantaim ol aposel, na ol bikman bilong kaunsil i kilim ol i dai, orait ol i egensim God, na nogut God i birua long ol na ol i kisim bikpela hevi.

Na Gamaliel em i no minim olsem, sapos God i pas long wok bilong ol aposel, orait em wantaim ol kaunsil ol i ken i lusim pasin nogut bilong ol na bihainim tok bilong ol aposel. Nogat. Gamaliel em i wanbel long paitim na solapim ol aposel, na dispela i soim olsem, em i les tru long bihainim tok bilong ol aposel (**lain 40**).

Gamaliel em i laik stopim ol aposel long autim tok bilong feifful wok bilong Jisas. Tasol em i pret long kisim hevi long han bilong God. Olsem na, em i stopim ol man bilong kaunsil i kilim ol aposel, tasol em i paitim ol aposel na solapim ol bilong stopim ol long autim tok bilong feifful wok bilong Jisas. Em olsem na pastaim i luk olsem Gamaliel em i gutpela man, tasol nogat.

Ol brata na sista, yumi mas lukaut long ol kain man olsem Gamaliel. Ol i ken i luk olsem ol i gutpela wokman bilong God na ol i pren bilong gutnius bilong God, tasol ol i no bihainim trupela tok bilong God na ol i egensim rot God i makim bilong kisim bek sinmanmeri. God i kisim bek sinmanmeri long rot bilong feifful wok bilong Jisas wanpela tasol na i no gat narapela rot. Em olsem tasol ol i save makim na bihainim ol narapela rot, na long dispela pasin ol i egensim rot God i makim na ol i egensim Jisas. Ol i birua long gutnius bilong God.

Ol i ken i tok “Yes, yes” long Jisas, tasol ol i no bilipim na trastim Em. Ol i ken i tok “Yes, yes” long Jisas, tasol ol i no bilipim na trastim Jisas Em i Man God i makim bilong kisim bek sinmanmeri. Ol i ken i tok “Yes, yes” long Jisas, tasol ol i no bilipim na trastim God long kisim bek ol long feifful wok bilong Jisas tasol. Nogat. Ol i bilipim na trastim God long kisim bek ol long *ol narapela samting*. Ol i bilipim na trastim *ol narapela samting* em i samting God i makim bilong kisim bek sinmanmeri. Olsem na ol i birua bilong gutnius bilong God.

Ol brata na sista, yumi no ken i pasim tingting bilong yumi na yumi tingim olsem, sapos ol i wokman bilong misin o long sios, orait ol i stap trupela wokman bilong God na ol i autim trupela tok bilong God. Nogat. Yumi mas yusim het bilong yumi na yumi skelim ol na skelim tok ol i autim.

Glenn.

Sapos yu laik save moa long dispela tok, orait yu lukim Aposel 5:33-42 long *Autim Tok* long www.pngbiblesources.org.